

Script of Evening Gojri News Bulletin 27 September 2024 at 1700 Hrs

ایوننگ گو جری نیوز بلیٹن مورخہ 27 ستمبر 2024

یوہ آکاشوانی جموں بے محمد اکرم چودھری تے عبدالمجیدتیں خبر سُنو۔ پہلاں خاص خاص خبر۔

- * 1۔ جموں کشمیر مانہ اسمبلی چناؤ گا آخری تے تیجا مرحلہ واسطے چناوی مہم ہن اختتام غے نزدیک ہے۔ اس مرحلہ غے دوران پہلی اکتوبر مانہ 40 اسمبلی حلقاں مانہ ووٹ پایا جائیں گا۔
- * 2۔ ضلع ریاسی مانہ بس ور ہوا دبشت گرد حملہ گا معاملہ مانہ ریاسی تے راجوری ضلعان مانہ قومی تحقیقاتی ایجنسی این آئی اے غی چھاپے ماری تے تلاشی جاری ہے۔
- * 3۔ وزیر اعظم نریندرمودی آئندہ اتا ریں آکاشوانی ور ”من کی بات“ پروگرام مانہ ملک غا لوکاں سنگ خطاب کریں گا۔
- * 4۔ تے کانپور مانہ کھیڈیا جا ربیا آخری تے دوجا ٹیسٹ کرکٹ مقابلہ مانہ کھیڈ غے پہلے روز بنگلہ دیش کرکٹ ٹیم نے 107 دوڑ بنا لی ہیں۔

خبراں غی تفصیل نال پہلا عبدالمجید۔

JK Campaining

جموں کشمیر مانہ اسمبلی چناؤ غا تیجا تے آخری مرحلہ غے تحت 40 اسمبلی حلقاں واسطے پہلی اکتوبر مانہ ووٹ پایا جائیں گا تے اس چناؤ واسطے چناوی مہم غا وی آخری تہاڑہ ہیں۔ صوبہ جموں غا 24 اسمبلی حلقاں مانہ 11 ضلع جموں، 6 ضلع کٹھوعہ، 4 ضلع ایدھم پور، 3 ضلع سانہ غا اسمبلی حلقہ جد کہ صوبہ کشمیر غی 16 اسمبلی نشستیں ور آخری مرحلہ غے تحت ووٹ پایا جانا ہیں۔ آکاشوانی نامہ نگار نے خبر دتی ہے جے بکھ بکھ سیاسی پارٹیاں غا لیڈر، ریلیاں، روڈ شوس تے ملاقات غے ذریعے ووٹراں مانہ اپنے در راغب کرن غی کوشش کر رہیا ہیں۔ سینئر بی جے پی لیڈر تے وزیر اعظم نریندرمودی پلک جموں آرہیا ہیں وے مولانہ آزاد سٹیڈیم مانہ عوامی ریلی سنگ پا رٹی غی چناوی مہم گا سلسلہ مانہ خطاب کریں گا۔ اوآن سینئر کانگریس لیڈر رابل گا ندھی نے ضلع سانہ غا رام گڑھ علاقہ غا دونے چک مانہ چناوی ریلی نال خطاب کیو ہے جد کہ کانگریس لیڈر پرینکا گاندھی پلکیں چناوی ریلیاں نال خطاب کریں گی۔ چناؤ غو تیجو تے آخری مرحلو بہت اہم رہے گو کیونجے اس مرحلہ غے تحت صوبہ جموں غی 24 نشستیں تے صوبہ کشمیر غی 16 اسمبلی نشستیں ور ووٹ پایا جائیں۔

ECI JK Poll Figure

جموں کشمیر مانہ اسمبلی چناؤ غا دوجا مرحلہ مانہ 57.31 فیصد ووٹ پایا گیا ہیں۔ چناؤ کمیشن غے مطابق 58 عشاریہ 35 فیصد مرداں تے 65 عشاریہ 22 فیصدی عورتاں نے 6 ضلعان غی 26 اسمبلی نشستیں مانہ اپنا حق رائے دیہی غو استعمال کیو ہے۔ ہن تک ہوا چناؤ مانہ شری ماتا ویشنو دیوی اسمبلی حلقہ مانہ سب تیں زیا دہ 80 عشاریہ 45 فیصدی ووٹ پان غی شرح درج کی گئی ہے۔ جد کہ سرنکوٹ مانہ ووٹ پان غی شرح 74 عشاریہ

94 فیصد تے پونچھ حویلی مانہہ یاه شرح 74 عشاریہ 56 فیصد ربی ہے۔ 1 اکتوبر نانہہ
آخری مرحلہ مانہہ 40 اسمبلی حلقاں مانہہ ووٹ کھلیا جائیں گاتے ووٹاں غی گنتری آندہ 8
اکتوبر نانہہ وے گی۔

SVEEP Kathua

جیسو کہ اسمبلی چناؤ غا آخری تے تیجا مرحلہ واسطے چناؤ غی تا ریخ نزدیک آری ہے۔
ضلع انتظامیہ کٹھوعہ نے اج سویپ پروگرام غے تحت بکھ بکھ سرگرمی منعقد کی۔ اس
سلسلہ مانہہ سرکاری ہائر سکینڈری اسکول لکھن پور مانہہ اک ثقافتی پروگرام مانہہ
ڈراما تے دوجی سرگرمیاں غے ذریعے ووٹراں نانہہ ووٹ پان غی تا کید کی گئی تے ووٹ
غی اہمیت بارے جانکاری دتی گئی۔ اس تقریب مانہہ بعد مانہہ ووٹ پان غو عہد وی لیو
گیو۔ آکاشوانی نال گل کرتاں واں ات آیا کجھ طالب علماں نے اس طرح کہیو۔ بانٹ۔

Katra Festival

صوبائی کمشنر جموں رامیش کمار نے اج 3 اکتوبر 2024 توں کٹڑہ مانہہ آندہ نوراترہ
تہوار واسطے تیاریاں گو جائزولیو۔ میٹنگ غے دوران سیاحت بارے ڈائریکٹر نے
پروگراماں غا تہہ پایا گیا ویلا تے تہوار بارے سرگرمیاں سمیت شراکت داراں غی طرفوں
گل بات دوران صلاح مشورہ ور اک تفصیلی رپورٹ نانہہ وی پیش کیو۔ صوبائی کمشنر
نے اس دوران قصبہ مانہہ خوبصورتی، صاف صفائی، ضروری خدمات، گڈیاں لاریاں متعلق
انتظامات تے ہنگامی خدمات غو وی تخمینو لایو۔ انہاں نے افسراں نانہہ ہدایت جاری کی
جے وے دومیل توں کٹڑہ قصبہ غے درمیان نوراتراں غا دنان مانہہ صفائی ستھرائی نانہہ
یقینی بناویں۔ ریاسی توں آکاشوانی گا نامہ نگار دویندر ٹھاکر نال گل کرتاں واں صوبائی
کمشنر جموں رامیش کمار نے اس طرح دسیو۔ بانٹ۔

NIA Raids

قومی تحقیقاتی ایجنسی این آئی اے نے اس سال جون مانہہ اک بس ور ہوا دہشت گرد حملہ
غے متعلق تحقیقات گا حصہ غے طور ور صوبہ جموں غا ضلع ریاسی تے راجوری مانہہ
بکھ بکھ جگہیں چھاپے ماری کی ہے۔ آکاشوانی نامہ نگار نے خبر ٹوری ہے جے سویرے
تیں ہی این آئی اے غی بہت ساری ٹیم چھاپے ماری کی ہے۔ واضع رہ جے ضلع ریاسی
گا شیو کھوڑی مندر تیں واپس آری یا تریاں نال پھری بس ور دہشت گرداں نے گولی پاری
کی تھی تے اس واقع مانہہ 9 افراد ہلاک ہو گیا تھا جن مانہہ 7 یا تریاں غو تعلق دوجی ریاسی
ستان سنگ تھو۔ تے 41 افراد زخمی ہو گیا تھا۔ مہارا آکاشوانی غا نامہ نگار نے ریاسی
تیں سرکاری ذریعے غا حوالہ نال خبر دتی ہے جے چھاپے ماری غے دوران این آئی
اے غے ہتھ حملہ غے متعلق اہم ثبوت لگا ہیں۔

LG Tourism

عالمی سیاحت تہاڑا غا موقعہ ور لیفٹنٹ گورنر منوج سنہا نے دنیا پھر تیں سیلانیان نانہہ
جموں کشمیر مانہہ آن غی دعوت دتی ہے۔ سوشل میڈیا سائٹ ایکس ور ایل جی نے دنیا پھر
غا لوکاں نانہہ مدعو کیو ہے جے ان نانہہ قدرتی حُسن، امیر ثقافتی میراث تے مہمان نوازی
واسطے زمین ور جنت جموں کشمیر مانہہ آو چاہیے۔

Handicrafts

ہتھ کھڈی مرکز جموں تے بھارت سرکار غی کپڑاں بارے وزارت جموں ہٹ ور 11 توں
17 اکتوبر 2024 غے بشکار 7 روزہ گاندھی شلپیازار نمائش منعقد کرن جا رہی ہے۔ سرکار
ری ذریعے دسیو ہے جے پورا ملک توں ہتھ کھڈی تے ہینڈلوم (ریاستی عزاز یا فتم)
بٹر مند اس نمائش ماتہ حصولے غے اپنا کم غی نمائش کراویں گا۔

یہ خبر تم آکاشوانی جموں تیں سن رہیا ہیں خبراں غا باقی حصہ نال محمد اکرم چودھری۔
PM Mann Ki Baat

وزیر اعظم نریندرمودی آئندہ اتا ریں 11 بجے من کی بات پروگرام ماتہ ملک غا شہریاں
نال اپنا خیالات سانجھا کریں گا۔ اس ماتہ ریڈیو پروگرام غی یاہ 114 وین قسط وے گی
تے تیجی وری وزیر اعظم غو عہدو سنبھال تیں بعد جناب مودی غی یاہ چوتھی قسط وے
گی۔ من کی بات پروگرام آکاشوانی تے دور درشن غا تمام نیٹ ورکاں، اے آئی آر نیوز ویب
سائٹ تے نیوز آن انیر مو بائیل ایپ ور نشر کیو جائے گو۔ آکاشوانی، دور درشن نیوز، پی
ایم او، اطلاعات و نشریات وزارت غا یو ٹیوب چینلاں ور وی نشر وے گو۔ اس نشریات
تیں فوراً بعد آکاشوانی اس پروگرام ماتہ علاقائی زبانان ماتہ نشر کرے گی۔

Ek Ped Maa ke Naam

بوٹا لان غی اک بڑی مہم ”ایک پیڑ ماں کے نام“ غے تحت پورا ملک غے اندر ہون
توڑی 80 کروڑ توں زیادہ بوٹا لایا گیا ہیں۔ جنگلات، ماحولیات تے آب و ہوا بارے وزارت
نے کامیابی سنگ 80 کروڑ توں زیادہ بوٹا لان غو اپنو پُر عزم مقصد پورو کیو ہے۔
وزارت غے مطابق یوہ ہدف اس مہینہ غی 25 تا ریخ ماتہ حاصل کر لیو گیو تھو۔ جہیڑو
جے تہہ شدہ آخری تا ریخ توں 5 دن پہلاں ہی حاصل کر لیو گیو تھو۔ وزارت نے کامیابی غو
سہرو سرکار ایجنسیاں مقامی برادریاں تے بکھ بکھ شراکت داراں غی سانجھی کوششاں
غے ناں منسوب کیو ہے۔ واضعہ جے وزیر اعظم نریندرمودی نے اس سال 5 جون ماتہ
عالمی ماحولیات بارے تہاڑے ور نوی دہلی ماتہ ایک پیڑ ماں کے نام مہم غو افتتاح کیو
تھو۔ جس نے پورا ملک غے اندر بوٹا لان ماتہ اک بڑی کامیابی حاصل کی ہے۔

Websites

سرکار نے شہریاں غی پین تے ادھار غی تفصیل عام کرن آلی انٹرنیٹ و سائٹس بند کر
دتی ہیں۔ الیکٹرانک تے اطلاعی ٹیکنالوجی غی وزارت نے گجھ ویب سائٹس غی
شناخت کی جہیڑی شہریاں غی ذاتی شناختی جانکاری عام کر رہی تھیں۔ جن ماتہ ادھار
تے پین کارڈ غی جانکاری وی شامل تھیں۔

Poonch

نوجوان خدمات تے کھیڈاں بارے محکمہ پونچھ نے اج ضلع غا نوجوان کھیڈاریاں واسطے
”سیوا سے سیکھ“ تجرباتی سکھلائی پروگرام منعقد کیو۔ پونچھ توں آکاشوانی غا نامہ نگار
ر آنوبھو مصری نے رپورٹ توری ہے جے اس پہل گو مقصد نوجوانان ماتہ سماجی ذمہ
داری تے خدمات غی قدر فراہم کرنو تھو۔ ضلع پونچھ غا نوجوان خدمات تے کھیڈاں بارے
افسر مول راج نے آکاشوانی غا نامہ نگار نال گل کرتاں واں اس طرح جانکاری دتی۔۔۔
بانٹ

Cricket

کرکٹ مانہہ بنگلہ دیش تے بھارتی کرکٹ ٹیم بشکا ر دووجو تے آخری ٹیسٹ کرکٹ مقابلو اج کانپور مانہہ شروع ہوو۔ پہاری بارش غی وجہ نال میچ بعد دوپہر روک دتو گیو تے اُس وقت تک بنگلہ دیش کرکٹ ٹیم نے 3 کھیلاڑیاں غا نقصان ور 107 دوڑ بنا لیں تھیں۔ مومن الحق 40 تے مشفق الرحمن 6 دوڑ بنا غے کھیڑ ریا تھا۔ بھارتی کرکٹ ٹیم غی طرفوں آکاش دیپ نے 2 تے روی چندرن اشون نے 1 کھیلاڑی مانہہ آوٹ کیو۔ مقابلو شروع ہون تیں پہلاں بھارت نے ٹاس جت غے پہلاں فیلڈینگ کرن غو فیصلو لیو۔ یا درہ جے بھارتی کرکٹ ٹیم نے پہلو ٹیسٹ مقابلو چنی مانہہ 280 دوڑاں غا بڑا فرق نال برا دتو تھو۔

Weather

جموں تے اس غا کول کال غا علاقان مانہہ اج سویرے بدل بریو ہے۔ جس گو خاصہ ویلے تیں انتظار تھو۔ تے اس بدل غا برن نال لوکان مانہہ راحت پُجی ہے۔ وادی کشمیر غا اُچیرہ علاقہ گلمرگ مانہہ موسم غی پہلی برفباری ہوئی ہے۔ جد کہ میدانی علاقان مانہہ ہلکی تون درمیانہ درجہ غی بارش ہوئی ہے۔ محکمہ موسمیات نے سنتھن ٹاپ، رازدان ٹاپ، پیر کی گلی جیسا اُچیراہ مقامات ور آئندہ 24 گھنٹاں غے دوران ہلکی برفباری ہون غی پیشنگوئی کی ہے۔

اس غے نال ہی خبراں غو یوہ بلیٹن ختم ہوو۔